

Gui'ch guxhaal San Pabl loj Filemón

¹Naj Pab, yu'n ladxguuib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayèn da'tan lüj. ²Raxhaal tën gui'ch guie par gra ree bèn rliladx Jesucrist bèn rado'p ree lidxil, në par Apia nètëë par Arquipo, bèn naj dux compniar ree caytie'ch ree xtiidx Jesucrist. ³Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëë Pab quixtëë loj Dios por Filemón

⁴Beegaj chi rbedx rniaaban Dios rudèn quixtëë lojman por lüj, ⁵din ma cwa'n ruson guial dád rënl rliladx tëël Dad Jesús dád rën tëël gra ree bèn ma naj xbejn Dios. ⁶Rniaab tën lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdxe ni raya'p ree guial ma nayajc ree tijbzi con Jesucrist. ⁷Dád nix yu' luxdon rabaa tën guial rënl dux compniar ree bèn rliladx ree Jesucrist, din por lüj bijch ma bayu luxdoo reeman zagdxe.

Rniee Pab por Onésimo

⁸Zeel majsi ra'pan gualrniabee par ganin conin rayal güünl guial

najn tijb xi apóstol Jesucrist, ⁹per guial rayèn du lasa', zagdxeli rniaaban lojl, naj Pab, ma najn tijb bengol abi' yan yu'n ladxguuib guial rtiechan xtiidx Jesucrist, ¹⁰rniaaban lojl por Onésimo, bèn naj zi'c da xi'n'an guial ma bililadxaman xtiidx Jesucrist ni ben lojman lën ladxguuib guie.

¹¹Gocli achet sirv been Onésimo lüj, per yan zi'c rüjnman naj sirv ziangajc güünman lüj sirv.

¹²Yan caydxi'n laaman lidxil, gunajchi'man zi'c rniaajchi'l naj.

¹³Guyënan nizujman con naj din nüjnman naj yudar luar lüj, la'tgaj yu'n ladxguuib guial rtiechan xtiidx Jesucrist. ¹⁴Per ad guyëntan nünan xhienin sin xtiidxbeel din xhietëëz favor güünl por naj ad züjntilan naguiejn, güünlan guial guiënl.

¹⁵Bal brii Onésimo lidxil tiblädëd, per gojc zian din chile' sunëman lüj tiblyaaa, ¹⁶per ad zi'ctri tijb mojs, mazri zagdxe guial loj tijb mojs, zi'c tijb bijchil bèn rënl. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

¹⁷Yan bal walil nayajc ree compniar por Jesucrist, baca'

Onésimo gunaladx naj gajcan. ¹⁸Bal yu' xhie beenman lüj, o bal yu' xhie ralaman lojl, naj yaguix laan.

¹⁹Abi' naj Pab, quijb naj cuca diidx guie ree: Naj yaguixan, majsi rulüü ad rüjnt naguiejn ganin lojl din gusaaladxil guial xt xguialnabanl ralil lon. ²⁰Yan been naj favor guin guial rēnl Jesucrist, zian bagu' luxdon guial nayajc xbejn Jesucrist.

²¹Naj caxhal gui'ch guie lojl abi' ragbeechaawan guial guzoobil da diidxan, ragbee tēen guial mazri naj ni güünl guial loj ni canin lojl.

²²Been tēē porvinid lēnü lidxil lod yaya'nan, din zi'c cabejdx canabidi Dios, ragbeen tiébaman guidganan lējt.

Diidx bigra ca ree loj gui'ch guie

²³Epafras, bēn yu'nē'n ladxguiib guial ratie'chan xtiidx Jesucrist, rugajpdiozaman lüj. ²⁴Nēgajc Marcw, Aristarco, Demas nē Lujc, bēn cayüjn gajc ree naj yudar caytie'chan xtiidx Jesucrist nē reeman rugajpdioz lüj. ²⁵Dad Jesucrist güünle' lējt.